

Date – 28/02/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Ramchhung hmeichhe naupang kum 14 tling tawhte tana chhul cancer laka invenna damdawi HPV pek beihpui chu vawiin khan Rajasthan-a Ajmer-ah Prime Minister Narendra Modi-a'n a hawng .
2. Health minister Pi Lalrinpuiin chhul hmawr cancer venna damdawi a thlawna sem beihpui thlakna chu Mizorama kalpui turin Civil Hospital Aizawlah a hawng ve nghal.
3. Chief Minister Pu Lalduhoma chuan Unnati Scheme hnuaiia a fapain loan puk a tum chu dik lohna a awm lo a ti.
4. Israel leh United States-ten Iran an bei a, Israela-ah emergency puan a ni.



HPV

Ram pum huapa hmeichhe naupang kum 14 tling tawhte tana chhul cancer laka invenna damdawi Human Papillomavirus (HPV) pek beihpui chu vawiin khan Rajasthan-a Ajmer-ah Prime Minister Narendra Modi-a'n a hawng a, a bul tan nan hmeichhe naupang 5 hnenah HPV vaccine pek a ni.

Pu Modi-a chuan hmeichhiate harsatna te ber thlenga chinfel dan ngaihtuah chu BJP sorkar thil ngaihpawimawh hmasak zingah a tel thu sawiin hemi kawnga hmalakna pawimawh pakhat chu HPV vaccine pek beihpui hi a ni, a ti a, he campaign hi ramchhunga hmeichhiate tihchakna tur hmanrua zinga a tel thu a sawi bawk.

Mizoramah pawh Health minister Pi Lalrinpuii hovin Aizawl Civil Hospital Aizawl Auditorium-ah Prime Minister programme hi video conferencing hmangin sorkar hotute, sikul hrang hranga kum 14-15 inkar zirlai hmeichhiate leh nu leh paten an chhim a ni.

Health minister Pi Lalrinpuii chuan chhul hmawr cancer venna damdawi a thlawna sem beihpui thlakna chu Mizorama kalpui turin Civil Hospital Aizawlah a hawng ve nghal a; Mizoram hi mihring cheng zat atanga teha India rama cancer vei tam berna a nih thu sawiin, hei hi a vei thu leh mithiamte zirchianna hrang hrang a chhiar nasat thu te, Mizorama cancer thlentu tam ber chu sarep ei nasat leh vaihhlo zuk leh hmuam tih nasat vang nia mithiamten an hmuh chhuah thu a sawi.

Pi Lalrinpuii chuan chhul hmawr cancer venna damdawi, HPV vaccine hi khawvel ram 160-ah hman a nih tawh thu sawiin, Mizorama sorkar damdawiin hrang hrang atangin a thlawnin pekchhuah a nih dawn thu a sawi bawk.

Health Department hotute sawi danin, chhul hmawr cancer venna damdawi hi India ram pumah hmeichhe naupang kum 14 tling tawh zinga kum 15 la tling si lote hnenah pek tura ruahman a ni a, mahse, Mizoram sorkar hotuten sorkar laipui an ngen angin Mizoramah chuan he damdawi hi tleirawl kum 14 atanga kum 15 leh thla 3 inarte hnenah a thlawnin pek a ni ang.

Chhul hmawr cancer hi hmeichhe natna bik a ni a, chhul hmawr cancer za zela 99.7 hi Human Papilloma Virus-in (HPV) a thlen a ni.

HPV chi hrang zinga 17-te hi cancer thlentu bik ni a hriat a ni a. Heng chi 17 zingah hian HPV 16 hi chhul hmawr cancer thlentu hlauhawm ber zing ami niin, khawvel puma chhul hmawr cancer zinga zaa 77 hi HPV 16 leh HPV 18 inkawp in a thlen a ni a, India ramah chuan chhul hmawr cancer zinga zaa 88 hi he virus hian a thlen a ni. HPV natna hi kawppuite hnenah kaichhawn a awlsam hle a, tunah hian khawvel pumah ram 160-ah HPV vaccine hi hman tawh a ni a. South East Asia Region a ram 10 zinga ram 8-ah HPV Vaccine hi hman mek niin, India ramah chuan HPV Vaccine hi private damdawi inah kum 2008 atangin hman tan a ni tawh bawk

Khawzawl District Hospital-ah pawh HPV Vaccine pek beihpui thlakna tur wawiin khan hawn a ni.

Vawiin khan Khawzawlah HPV Vaccine single dose chu pekchhuah a ni a, Khawzawl Bawrhsap Pu K. Vanlalthiana'n hawnna hun a hman.

Khawzawl District hnuaiah hian Rabung PHC, Kawlkulh PHC, Khawhai PHC, Sialhawk PHC, Biate CHC leh District Hospital Khawzawl ah te hian kum 14 atanga kum 15 leh thla thum chinte Vaccine pek an ni a, Khawzawl District Hospital bikah hian Govt. Little Flower School zirlai thlan chhuahte hnenah HPV vaccine single dose hi pek an ni.



LUNGLEI KISAN MELA

Lunglei District Agricultural Technology Management Agency (ATMA) huaihawta Lunglei Agriculture Complex-a ni hnih awh Kut Hna Thawktute Kutpui, "Kisan Mela" chu wawiin chawhnu khan khar a ni a, kharnha inkhawm hi Lunglei West bialtu MLA Pu T. Lalhlimpuia'n a hmanpui.

Pu T. Lalhlimpuia chuan Kisan Mela chu thlai thar pho chhuahteah chauh ni lovin, huan enkawl dan leh hna thawh dan hriatna tura inkaihhraina hun tha tak a nih thu sawiin, kut hna thawha hmasawn turin ruahmanna fel tak nena hma lak leh tun lai thiamna thar hman tangkai thiam a pawimawh thu a sawi a ni.

ATMA Kisan Mela-ah hian thlai leh thil dang pho chhuahteah intihsiakna siam lovin, department hrang hrang hnuaia kut hna thawktu tha thlan chhuahte hnenah "Best Farmer Award" hlan a ni a. Lawmman tur sum hi MLA Pu T. Lalhlimpuia chuan tumin, farmer 12 hnenah farmer pakhat zelah ₹5,000/- leh certificate hlan a ni.

Lunglei District Kisan Mela hi mipuite'n an hlut hle a, ni khatah mi 6,000–7,000 velin an tlawh anga chhinchhiah a ni a. Thlai leh thil thar chhuah hrang hrangte a man tlawma zawrh niin, hemi atan hian kut hna thawktute hnenah support price pek a ni a. Department leh an hnuai kut hna thawktute stall hawnga an inpho chhuah bakah, thlawh hma enkawl kawnga hriat tur pawimawh hrang hrang (information booklet) siam leh sem a ni bawk a. Animal Health Clinic-ah ran entir 250 vel awmin, ui a hri danna (Anti-Rabies Vaccine) 80 chuang pek a nih bakah, damdawi chi hrang hrang sem a ni.

<><><>

UNNATI LOAN - CM

Chief Minister Pu Lalduhoma chuan Unnati Scheme hnuai a fapain loan puk a tum chu dik lohna a awm lo a ti.

Pu Lalduhoma hian Champhai North bialtu MLA Pu H. Ginzalala private resolution putlulh 'ZPM Sokarin Mizoram tana a hnathawhte hi a lawmawm kan ti' tih sawihonaah Unnati Scheme hnuai loan puk chungchang hi a sawichhuak a ni.

Chief Minister chuan loan an puk tur zat atanga an lakchhuah chin zelah a pung an pek mai dawn thu sawiin, nakinah heti zat zat hi puk a tul lo an tih chuan an la rek bung thei a, hei aia tam hi puk teh ang an tih pawhin an la dil pung thei a. Chu chu a kalhmang a ni, a ti a; Chawlh hma an in sak hna chu inthlan hma daih atanga an bultan tawh a nih thu leh tunah hian MLA pawh ni lo mahse, an tih dawn tho thu a sawi bawk.

<><><>

MPCC

Congress Party Thalai, MPYCC chuan Assembly a “The Mizo Marriage and Heritance of Property Ammendment bill (2026)” a sawi hawnnaah Chief Minister chuan Mizo hmeichhia, nu leh pa leh an chhungte rilru a hliam na hle an ti a. He a thusawi hian Constitution-a Fundamental Rights Article 14, 15 leh 21 te a kalh a ni an ti.

Chief Minister chuan mawhphurhna la ngam lo a nih zia lantiron Civil Society leh he Bill draft Review Committee tih anga he bill hi pu lut ah insawin a pha kual leh bawk a ni an ti a, ZPM Chief Minister leh ZPM sorkar kalphung chu Congress Thalai chuan hmalakna tha lo leh mahni thu zuk ching an nihzia leh midang puh kual mawhphurhna la ngam lo, lal duh hrim hrim sorkar an nihzia a nemnghet ah a ngai an ti a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

BJP

BJP Mizoram State Joint Treasurer Pi Lalremsangi leh BJP Mamit District hruaitu ten Mamit Division hnuaiawng kawng siam mek chungchang ah PWD EE Pu Lalngaisanga hmuin, Mamit khawchhung kawng siam mek nana pawisa hmuh ang ang daihzai taka hman tum a nih thu a lo hrilh a. Mamit leh Sihthiang inkar te, Mamit leh Damparengpui inkar te, Silsury lehPukzing Vengthar inkar te siam tura hmalak mek a nih thu a sawi bawka, hemi chungchang hi BJP Mamit District hruaitu ten Central Minister, Durgadas Uikey an Mamit a tlawh tum a an lo thlen niin, Ministry of Road Transport & Highway ah pawh ziaak a an thlen tawh a ni a, State hruaitu te nen an bawhzuina kal zel a hlawhtlinna hmuh a ni dawn ta a ni an ti

BJP hruaitute hian Mamit kawng siamtu Company, Sumati Infrastructure Pvt Limited Project Manager Amit Prasad pawh hmu in, Aizawl atanga Mamit luh dawn a, an hnathawh mek na ah mipui thawhtheih chi hna awm te pawh Tualechhung mi te duhsak chung a tha taka hnathawh mek a nih thu BJP hruaitu te a lo hrilh chu a lawmawm hle a ni a ti.

Pi Lalremsangi chuan, Lengte peng pelh atanga Mamit kawng siamna tur National Highway office in an tender mek ah, tha taka hnathawh thei tur sorkar in a thlan ngei an beisei a ti a. BJP Mizoram chuan Aspirational district ni mek Mamit District ah hmasawna chak taka a kal theih nan an ngaihven reng dawn a ni a ti bawka.

<><><>

ISRAEL&US ATTACKS IRAN

Israel leh United States-ten vawiin khan Iran an bei a, Israel sipai thuchhuah tarlan danin, Iran ramchhung thlang lama Iran sipai hmun engemawzatah beihpui an thlak a ni.

Iran ram khawpui Tehran bakah khawpui dangah te pawh bomb a puak nia sawi a ni a, US President Donald Trump-a chuan sipai chakna hmanga Iran beih tan anih thu social media-a minute 8-a thui video-ah a sawi a, Iran sorkar ding lai laka America a him theih nan beihpui hi thlak a ni, a ti.

Israel Defence Minister, Israel Katz-a pawhin an ram himna tur ngaihtuahin Iran chu bei an ni tih a sawi a, Israel ram pumah emergency a puang nghal bawka a ni.

US leh Israel beihna hi chhang letin Iran chuan Gulf ram hrang hranga US hmunte a bei ve nghal a, Abu Dhabi, Bahrain leh Kuwait-ah te bomb puak ri hriat tur a awm a ni. Bahrain chuan Manama-a US Navy 5th Fleet Hqrs chu missile-a kah a nih thu a sawi a, Qatar Defence Ministry chuan an ram lama missile kah luhte chu Patriot Defence System hmangin lo kah thlak zel a ni, a ti a,Israel ramchhung hmar lamah pawh thil puak ri hriat tur a awm reng a, ram pumah inralrinna dar siren tih rik a ni.

<><><>